

FILEMONIT

1

KAPITULL 1

Pali, i burgosuri i Jezu Krishtit, dhe vëlla Timoteu, Filemonit të dashur dhe bashkëpunëtorit tonë,

² motrës Apfi, bashkëluftëtarit tonë Arkipit, dhe kishës që mbledhet në shtëpinë tënde:

³ hir dhe paqe mbi ju prej Perëndisë sonë, Atit, dhe Zotit Jezu Krisht.

⁴ E falënderoj Perëndinë tim, duke të kujtuar gjithnjë në lutjet e mia,

⁵ sepse po dëgjoj për dashurinë tënde dhe për besimin që ke ndaj Zotit Jezu Krisht dhe ndaj gjithë shenjtorëve,

⁶ që bashkësia e besimit tënd të bëhet e frytshme nëpërmjet njohjes së çdo të mire që është në ju për shkak të Jezu Krishtit.

⁷ Sepse ne patëm gëzim të madh dhe përdëllim nga dashuria jote, sepse me anën tënde, o vëlla, zemrat e shenjtorëve u përtërinë.

⁸ Prandaj, edhe pse kam liri të plotë në Krishtin të të urdhëroj atë që duhet të bësh,

⁹ më shumë më pëlqen të të lutem për dashurinë, kështu siç jam unë, Pali, plak dhe tashti edhe i burgosur i Jezu Krishtit;

¹⁰ të lutem për birin tim Onesim, që më lindi në prangat e mia,

¹¹ i cili dikur s'kishte fare vlerë për ty, por që tani është shumë i vlefshëm për ty e për mua,

¹² të cilin ta dërgova përsëri; dhe ti prite atë, zemrën time.

¹³ Do të desha ta mbaja pranë vetes që të më shërbente në vendin tënd në prangat për shkak të ungjillit;

¹⁴ por nuk desha të bëja asgjë pa mendjen tënde që e mira të cilën do të bësh të mos jetë nga detyrimi, por me dashje.

¹⁵ Sepse ndoshta për këtë arsye që ndarë prej teje për pak kohë, që ta kesh atë përgjithmonë,

¹⁶ por jo më si skllav, por shumë më tepër se skllav, vëlla të dashur, sidomos për mua, por aq më tepër për ty si sipas mishit, ashtu dhe në Zotin.

¹⁷ në qoftë se ti, pra, më konsideron shok, prite si të isha vetë!

¹⁸ Dhe në qoftë se të ka bërë ndonjë padrejtësi ose të ka ndonjë detyrim, m'i ngarko mua.

¹⁹ Unë, Pali, i shkrova me dorën time. Unë vetë do të paguaj; që të mos them se ti më detyrohesh edhe veten tënde!

²⁰ Po, vëlla, ma bëj këtë nder në Perëndinë! Ma përtëri zemrën në Perëndinë!

²¹ Të shkrova me plotbesim se do të më dëgjosh, sepse e di se ti do të bësh edhe më shumë nga sa po të them.

²² Më përgatit njëkohësisht një vend për të ndenjur, sepse shpresoj se, për hir të lutjeve

tuaja, do t'ju dhurohem përsëri.

²³ Epafra, i burgosur bashkë me mua në Jezu Krishtin,

²⁴ Marku, Aristarku, Dema dhe Lluka, bashkëpunëtorët e mi, të bëjnë të fala.

²⁵ Hiri i Zotit tonë Jezu Krisht qoftë me frymën tuaj. Amen.

For other languages please go to **www.wordproject.org**